

江西詩徵

江西詩徵卷八十五

南城曾煥賓谷編輯

名媛

張夫人

以下唐

夫人楚州山陽人戶部侍郎鄱陽吉中孚妻

古意

轆轤曉轉素絲經桐聲夜落蒼苔磚涓涓吹溜若時雨濯
濯嘉蔬非用天丈人不解此中意抱甕當時徒自賢

拜新月

拜新月拜月出堂前暗魄深籠桂虛弓未引弦拜新月拜
月妝樓上鸞鏡未安臺蛾眉已相向拜新月拜月不勝情

月臨人自老望月更長生東家阿母亦拜月一拜一悲聲
斷絕昔年拜月逞容儀如今拜月雙淚垂回看眾女拜新
月却憶閨中年少時

春日雪

霽霽芳春朝雪絮起青條或值花同舞不因風自飄過
淨綠醅拂幌綴紅綃那用持盃翫春懷不自聊

拾得華氏花鈿以詩寄贈

今朝妝閣前拾得舊花鈿粉污痕猶在塵侵色尚鮮曾經
纖手製貼向翠眉邊能助千金笑如何忍棄捐

誚喜鵲

疇昔鴛鴦侶朱門賀客多如今無此事好去莫相過

張氏

張氏袁州人評事彭伉妻

寄夫

久無音信到羅幃路遠迢迢遣問誰問君折得東堂桂折罷那能不暫歸

驛使今朝過五湖殷勤爲我報狂夫從來誇有龍泉劒試割相思得斷無

程長文

長文鄱陽人

銅雀臺怨

君王去後行人絕簫笳不響歌喉咽雄劍無威光彩沈寶

琴零落金星滅玉階寂寞墜秋露月照當時歌舞處當時
歌舞人不迴化爲今日西陵灰

春閨怨

綺陌香飄柳如線時光瞬息如流電良人何處事功名十
載相思不相見

獄中書情上使君

長文爲強暴所誣
繫獄獄獄詩雪冤

妾家本住鄱陽曲一片貞心比孤竹當年二八盛容儀紅
箋草隸恰如飛盡日閑窓刺繡坐有時極浦採蓮歸誰道
居貧守都邑幽居寂寞無人識海燕朝歸衾枕寒山花夜
落堦堦濕強暴之男何所爲手持白刃向簾幃一命任從
刀下死千金豈受暗中欺我心匪石情難轉志奪秋霜意

不移血濺羅衣終不恨瘡粘錦袖亦何辭縣僚曾未知情
緒卽便教人繫囹圄未唇滴瀝獨銜冤玉筯闌干嘆非所
十月寒更更愁人一聞擊柝一傷神高髻不梳雲已散蛾
眉淡掃月仍新三尺嚴章難可越百年心事向誰說但看
洗雪出圜扉始信白圭無玷缺

魏

玩以下宋

玩字玉汝襄陽人道輔姊曾文肅布妻博涉羣書
工詩尤擅人倫鑒累封道國夫人嘗有戲文肅句
云使君自爲君恩厚不是區區愛華山又有句云
金馬並遊三學士朱幡相對兩諸侯爲時所傳有
魏夫人集

虞美人草行

鴻門玉斗紛如雪十萬降兵夜流血咸陽宮殿三月紅霸業已隨灰燼滅剛強必死仁義王陰陵失道非天亡英雄本學萬人敵何用切切悲紅妝三軍散盡旌旗倒玉帳佳人坐中老香魂夜逐劍光飛青血化爲原上草芳心寂寞倚寒枝舊曲聞來似斂眉哀怨徘徊愁不語恰如夜聽楚歌時滔滔逝水流今古楚漢興亡兩邱土當年遺事久成空慷慨樽前爲誰舞

王文淑

文淑臨川人荆公妹張奎妻封長安縣君

戲詠白羅縠

看羅如雪縹緲惹住烏雲不放回還似遠山秋水際夜
來吹散一枝梅

李氏

李氏建昌人公擇妹江西洪宜郎中妻封文城縣
君

挽兄公擇尚書

久歷金門貴未酬黃屋知如聞天祿客抱恨作銘詩

王氏

王氏荆公女吳安持妻封蓬萊縣君

寄父

西風不入小窻紗秋意應憐我憶家極目江山千里恨依

然和淚看黃花

謝氏

謝氏九江人王元甫妻

送外

此去惟宜早早還休教重起望夫山
君看湘水祠前竹不是兒兒淚染斑

何師韞

師韞字季才金谿人抱甕先生天棐女日誦千言
父以比謝道韞故名適臨川饒腴喜浮屠教遍閭
華嚴諸經一日偕夫往白楊山寺作失假山偈云
云孀居四十年所居有懶思樹因自號懶思道人

紹興間張魏公母亦通禪學入閩道出界山聞其名踵門求見與語契合呼爲無生法友有詩集

失假山偈

片石亡來歲月深昔時求覓到如今誰知只在家山裏枉費工夫別處尋

自題嬾愚堂

君不見南嶽嬾殘師佯狂啖殘食粥涕任垂頤嬾爲俗人拭又不見愚溪子柳子堂堂古遺直因以愚名溪於今慕其德二子眞吾師欲見不可得惟有嬾愚樹終日對顏色齊威勤讀書輪扁巧斲輪勤巧動心志何如嬾愚眞衰年髮已皤行少坐時多亦欲效勤巧奈此嬾愚何

汪氏

汪氏德興人彥章女內江劉五清之配

寄良人

旅食京華歲月多聖賢事業竟如何
明年佇聽泥金報閒把關雎獨自歌

陳梅莊

梅莊新昌人提刑陳仲微女胡縣丞妻少工文翰
有詩集

述懷

一寸柔腸萬疊縈那堪更值此春晴
黃鸝知我無情緒飛過花梢禁不聲

一片愁心怯杜鵑
懶妝從任鬢雲偏
怕郎說起陽關意
常掩琵琶第四絃

山城落日弄昏黃
又了平生半日忙
侍妾不須燒絳蠟
讓他明月入迴廊

來氏

來氏豫章人

水仙花

瑤池來宴老仙家
醉倒風流萼綠華
白玉斷筭金釵頂
幻成癡絕女兒花

花盟平日不曾寒
六月曝根高處安
待得秋殘親手種
萬姬圍繞雪中看

鄱陽婦

建炎初題黃連步接官亭壁

并序

妾鄱陽人女工之外從事詩禮不幸嚴霜下墜泰
山其頽漂泊一身所適非偶薰蕕同器情何以堪
昨浮家洞庭怒張一帆良人倏然鬼錄吁臣不事
二主女不事二夫其奈何哉偶攜稚子來登客亭
感時傷心遂成小絕知我者其天乎

故里蕭條一望間此身漂泊歎空還感時有恨無人說愁
歛雙蛾對暮山

黃嗣貞

以下元

嗣貞字玉娘金谿人以權女適新圃吳泰發莊靜

好學泰發客死三衢時嗣貞年二十七迎喪於途
自爲文祭之詞旨悽惻又賦三十韻詩教其二子
後俱成立元大德間上其事於朝得旌番陽吳顯
取詩文彙而集之危太樸吳文正爲之敘

詠鏡中燈

寶炬菱花共照臨風吹不斷影沉沉五更滄海含朝日半
夜金星犯太陰翠袖拂塵紅燭冷朱唇呵霧碧光深任教
撩亂飛蛾撲難滅虛明一點心

聞漁唱

網影垂簾江樹空晴川掩映落霞紅誰知千古興亡事盡
在漁歌欸乃中

訓子詩三十韻

羨生亦良苦百事百不如十九離自黃執筐歸于吳拋心
托藁砧低眉奉公姑未幾家多難言之重歎歎終身仰望
者語合心事殊捐家揭私財負擔走長途一去不復還竟
葬江之魚風雲陡地暗聞訃雙淚枯事變奈若何哭覆土
一區人皆侮新寡我獨耐孀居勞碌知此始官災無歲無
產業雖僅存家儲悉空虛隱忍饑與寒人或笑我迂越歷
艱與辛衆亦謂我愚矢心豈易常素志不負初哀怨難具
陳事勢罔盡敷因我固有由示汝信不誣思之日繼夜從
茲創規模汝曹各勉旃努力勤詩書詩書勤乃有懶惰終
疲鴛毋友莫已若勿交非吾徒動靜守法度視聽著工夫

涓流務深長大材積錙銖天付汝等閒猛省休踟躕光陰
競分寸宴安無須臾古來賢達人起身自勤劬蛟龍大海
物寧自辱汙渠書中萬事足莫被外物拘磨穿寸鐵心成
就千金軀庶足厭所望汝曹其勉諸

孫蕙蘭

蕙蘭名淑其先汴人年二十三歸新喻傅若金汝
礪於湘中五月而卒傅悲不自勝作詩悼亡序其
遺集曰綠窻遺稿

綠窻詩

窻裏人初起窻前柳正嬌捲簾衝落絮開鏡見垂條坐對
分金線行防拂翠翹流鶯空巧語倦聽不須調

小閣烹香茗疏簾下玉鉤燈光翻出鼎釵影倒沈甌婢捧
消春困親嘗散莫愁吟詩因坐久月轉晚妝樓

燈前催曉妝把酒向高堂但願梅花月年年映壽觴
采閣閉朝寒妝成擬問安忽聞春雪下喚婢卷簾看
粲粲梅花樹盈盈似玉人甘心對冰雪不愛豔陽春
小小春羅扇團團秋月生蟠桃花樹裏繡得董雙成
自拂雙眉黛何曾慣得愁若教如翠柳便恐不禁秋
樓前楊柳發青枝樓下春寒病起時獨坐小窗無氣力隔
簾風亂海棠絲

綠窗寂莫掩殘春繡得羅衣懶上身昨日翠帷新病起滿
簾飛絮正愁人

小妹方纔習孝經可憐嬌怯性偏靈自尋女誠憲前讀嘆
道家人不與聽

幾點梅花發小盆冰肌玉骨伴黃昏隔窗久坐憐清影閑
劃金釵記月痕

繡被寒多未欲眠梨花枝上聽春鶉明朝又是清明節愁
見人家買紙錢

春雨隨風溼粉牆園花滴滴斷人腸愁紅怨白知多少流
過長溝水亦香

春風昨夜碧桃開正想瑤池月滿臺欲折一枝寄王母青
鸞飛去幾時來

空階日晚雨纔乾小婢相隨倚畫闌金釵誤挂緋桃落羅

袖愁依翠竹寒

小窻今夕繡鍼閑坐對銀蟬整翠鬟凡世何曾到天上月
宮依舊似人間

乞巧樓前雨乍晴彎彎新月伴雙星鄰家小女都相學
取金盆看五生

庭院深深早閉門停鍼無語對黃昏碧紗窻外初生月照
見梅花欲斷魂

吳氏

吳氏昭武人伯固女貌美聰慧其夫詣闕上書稱
旨送太學三年不回吳氏作詩寄之未幾天子幸
太學夫受職歸

寄外

昔君曾奏三千牘，凜凜文風誰敢觸。
鄉老薦賢親獻書，邦侯勸駕勤推轂。
馬頭三控登長途，謂君此去離場屋。
整頓羅裳出送君，珠淚盈盈垂兩目。
枕前一一向君言，馬頭猶自丁寧屬。
青衫寸祿早榮歸，莫遣妾心成局促。
秋天冬暮風雪寒，對鏡懶把金蟬簇。
夢魂夜夜到君邊，覺來寂寞鴛鴦獨。
此時行坐閒窗紗，忍淚含情眉黛蹙。
古人惜別日三秋，不知君去幾多宿。
山高水濶三千里，名利使人復爾爾。
昔年曾撥伯牙絃，未遇知音莫怨天。
去年又奏相如賦，漢殿依前還不遇。
時人不知雙字訛，平川倏忽起風波。
當時南宮罷捷音，教妾沉吟杵中心。
爲君滴下紅粉淚，紅羅帳

裏濕鴛衾憤憤調琴蟬鵲噪默默吟詩怨桂林千調萬撥
不成曲爭那胸中氣相掬千思萬想不成詩心如死灰自
得知料得君心當此際已拚拋却閒田地朝朝暮暮望君
歸日在東隅月在西碧落翩翩飛雁過青山切切子規啼
望盡一月復一月不見音容寸腸結又聞君自河東來夜
夜不教紅燭滅雞鳴犬吠側耳聽寂寂不聞車馬音自此
知君無定止一片情懷冷如水旣無黃耳寄家書也合隨
時寄雁魚日月逡巡又一年何事歸期竟杳然堂上雙親
髮垂白用盡倚門多少力孟郊曾賦游子行陟岵如何不
見情室中兒女亦雙雙頻問如何客異鄉異鄉知是育才
處人情不免且契慕低頭含淚告兒女遊必有方况得所

八月涼風滿道途好聲在鞍尋舊路吾鄉雖多俊秀才往
往怕君頭角露聖朝飛詔下來青氈早早慰雙親飛龍
公道取科第男兒事業公卿志筆下密密爲君言書中重
重寫妾意秋林有聲秋夜長願君莫把斯文棄

董淑貞

淑貞餘千人譚友妻元季紅巾亂友與父母兄弟
俱被害董葬之與二女歸母家未幾有掌兵者造
其家欲汙之董曰我好人家請官長憑媒擇吉以
禮從事掌兵者信之時母柩在堂明日設祭并祭
其夫與舅姑叢薪於柩作歌云云乃縱火焚柩火
熾牽二女入烈焰死

歌

天蒼蒼兮不吾家造地茫茫兮不吾身容不造不容兮吾將托乎火以相從

賀氏

賀氏永新人適何氏至正十二年斬兵殺其夫帥

欲聘賀閉戶不納齧指血題詩於壁遂自刎死

按葉

世奇草木子爲廬陵曠維禎妻曾氏作陶宗儀輟耕錄則爲閩氏作敘事大同小異此據王逢梧溪集

齧指血題壁

涇渭難分清與濁妾身不幸厄紅巾孤兒豈忍更他姓烈女何曾事二人白刃自揮心似鐵黃泉要見骨如銀荒村

日落猿啼處過客聞知亦愴然

范氏

以下明

范氏清江人惇孫女早寡選入禁中偶題畫寄意
高后見之封爲夫人遣還鄉

題老嫗騎牛吹笛圖

一作明周維翰詩

玉環賜死馬嵬坡出塞昭君怨更多爭似阿婆牛背穩笛
中吹出太平歌

姜氏

姜氏新建人廣西右布政使忻女孫也嫁諸生丁
立祺

寄文學山居

何必入山深居然似漢陰
雨殘雲在竹野曠日平林
負郭多幽事爲農長道心
芸牕開卷罷多是聽鳴琴

江西婦女

氏族無考洪宣間人

一葉芭蕉

何處移來一葉青似同羅
扇門輕盈今宵風雨重門
靜滅却瀟湘幾點聲

安福郡主

郡主明寧靖王薨時之長女
嫁宣聖五十八世孫景文
天順元年封安福郡主工
草書筆勢遒勁無花骨欹
斜之態能屬文尤長於詩
與景文聯章廢

和積成卷中有桂華軒集

柳眼

一段風流態青青獨可親
公堤看去客隔水望歸人
滴露如蠟泣含煙似頰
顰半開還半合窺盡滿江春

夏景

炎炎赤日景偏長
宮院無風亦自涼
安得片雲彌天宇清
陰翳翳徧遐方

蕭鳳質

鳳質奉新人成化中因夫遊學爲詩寄之

寄外詩

欲把相思遠寄君
恐教客裏易傷春
閒花野草渾無賴
養

取蔡心向紫宸

婁妃

妃上饒人諒孫女郎中姓女也有家學爲寧庶人
宸濠妃濠謀不軌屢諫不聽又題樵人圖云云亦
以諷濠濠被擒妃投江死王文成聞之歎曰賢妃
也亟遣人收葬之比使往果得屍周身皆綿繩內
結故易辨也濠在檻車痛哭曰昔紂以聽婦言而
亡國孤以不聽婦言而亡身及在獄每節必祝曰
負吾賢妃聞者悲焉妃能詩文工書法今江西藩
署有屏翰二字臬署有執法二字皆肇稟書傳是

妃筆

按王陽明年譜
以妃爲婁諒女

題樵人圖

婦語夫兮夫轉聽采樵須是擔頭輕
昨宵雨過蒼苔滑莫向蒼苔滑處行

春遊

春晴並轡出芳郊帶得詩來馬上敲
著意尋春春不見東風吹上海棠梢

送別

金雞未報五更曉寶馬先嘶十里風
欲借三杯壯行色酒家猶在夢魂中

翠妃

宸濠內寵甚盛有翠妃者居綠英宮能吟善書尤

被寵幸常並輿出遊後濠敗爲一知縣掠去不知
所終

咏梅

繡針刺破紙糊窓引透寒梅一線香
蝶蟻也知春色好倒拖花片上東牆

春日寄恨

玉砌雕闌憶夢中粧成面而有東風
桃花生根隨流水一到人間更不紅

郭氏

郭氏江西士女善詩詞出嫁日過湖阻風於安仁
鋪時都憲王守仁亦阻風於此閑中賦石牛詩云

安仁鋪內倚闌干遙望孤牛俯在山未得下句因
問其處有文士能續者否女聞之卽續云任是牧
童鞭不起田園荒盡至今閑時宸濠肆虐百姓逃
亡田園多至荒蕪者故詩及之守仁大喜仍命作
一律旣成大稱賞命備綵幣送過湖完親

咏石牛

怪石崔嵬號石牛江邊獨立幾千秋風吹遍體無毛動雨
洗渾身有汗流嫩草平抽難下嘴長鞭仍打不回頭至今
鼻上無繩束天地爲欄夜不收

費氏

費氏鉛山人宏女適宜興吳尙書子吳好外位儼

不諧憂憤天死

臨終寄父

嚙指題詩寄老親
洞房孤負十年春
西江不是無門第
錯認荆溪薄倖人

盛善才

善才明武寧令盛文郁女孫博次女本錢塘人許配仁和潘有成未嫁成死才奔喪會水淹舍漂成尸才痛哭幾絕誓以守節文郁卒於官才遂家武寧招成魂以葬卒年七十葬石窩山一日石合其壠人以爲勁節所致

哭夫

自聞失所天賜中鹿盧旋此生已望絕相見或黃泉泉路
杳難測猶及撫哀筵謂常薦血淚以慰鬱離魂豈意霖雨
惡水勢忽奔魚族宿樹末日月遂冥昏零魄竟不歸沉
怨在千年河伯何太虐天地亦嗚咽金石雖銷毀此恨終
古然悲風來四野惻惻不忍言

答姪孫婦李氏

人倫久荒沈風雲遞變滅今日城南妻明朝城北妾畧不
念舊恩曲取新人悅及其意思盡回首成秦越賤骨委黃
土千秋莫能雪此理竟誰明與子存其說

述志

哀哉妾薄命未歸夫已殂俊魄竟長逝千載永痛呼五倫

始夫婦節義信難誣固未通箕帚采幣有成謨仰觀天上
月清光映玉壺在山有義雉失類則悲鳴妾雖巾幘質頗
明昔人書歷歷古賢烈名字耀金琚苟能行其志今昔豈
不如此心常炯炯持以報吾夫

李氏

李氏武寧人盛珏妻年十九珏死無子祖姑盛善
才賦詩隱諷以觀其志李有誓章與善才縞素相
依五十餘年足不踰戶庭其夫忌日及歲時致祭
盡哀至老不衰卒年七十有七

哀詩

結髮爲夫婦三載到於茲君既歸重泉豈復有還時空房

琴劍冷廐馬裘夏嘶羅幃春生寒膏沐奚忍施幽明永隔
絕千年無見期在君之精魄當化壁與奎燦爛青天上照
耀修水湄妾抱萬古恨沒命有餘悲願言存大節不受古
人非

誓章

清清江中水皎皎天上月水色與天光終古無緇涅惟姑
有素心與之方皎潔厓懸葉婦頭磚漬譚氏血邈矣二賢
媛萬季稱奇節惟姑無岐志與之厲貞烈妾亦未亡人况
復承巾櫛生雖不盡歡死則義同穴守節分所宜立身貴
察察亦以正性命安問茹冰雪

李妙惠

妙惠揚州人適南昌士人盧穿穿下禮闈第讀書
西山寺有同名者死京師鄉人誤傳父母強之嫁
於江西鹽賈謝啓自縊者再爲人所救乃勉從父
母命比入謝家堅侍謝母傍執役不去啓不敢犯
旋復求爲尼不得尋發舟過金山題詩寺壁穿後
登第遊金山見詩知爲妻作從謝所迎歸爲夫婦
如初

題金山寺壁

一自當年拆鳳皇至今消息兩茫茫蓋棺不作橫金婦入
地還從折桂郎彭澤曉煙歸宿夢瀟湘夜雨斷愁腸新詩
寫向金山寺高挂雲帆往豫章

吳氏

吳氏江右人福州守吳某之女未笄甚敏慧玉色
穠麗隨父秩滿還朝候風於淮安之版鍾隣舟有
太原江情者年十六亦隨父讀書舟中女數從窻
隙窺之情亦流盼乃托婢以詩挑之女爲詩以答
遂期於舟中比明江舟已去女惶迫藏情榻下三
日事覺吳乃僞爲拯溺者稱爲故人子以女歸之
使人詣晉告情父遂成媼好情尋成進士官至某
郡太守

酬江情

自是芳情不戀春春光何事憐閨人淮流清浸天邊月比

似郎心向我親

豫章婦

豫章商人賈金陵見一女新寡有色以厚貲娶歸
比居士人窺見以簪刺牕紙擲詩挑之婦艷然亦
作詩拒之

絕客詩

失翅青鸞似困鷄偶隨孤鶴到江西春風桃李空嗟怨秋
水芙蓉強護攜仙子自居蓬島境漁郎休想武陵溪金鈴
掛在花枝上不許流鶯聲亂啼

榮氏

榮氏南歌人

馬上作

妾長朱門十九春，豈期今逐馬蹄奔。失身無補君王事，殉節難酬夫壻恩。江淨已甘沉弱質，月明誰與弔孤魂。此生骨肉終難見，獨向西風哭夜猿。

黃淑貞

淑貞星子人，侍衛胡季節室。有繡閣小草。

曉窻咏燕

海燕雙飛繞畫梁，窻前忽墜紫泥香。呢喃語共黃鸝轉，來往翻同玉蝶忙。似識花開歸巷口，如因春晚出昭陽。爲巢不羨新庭院，只到盧家舊草堂。

輓劉雪舫先生

禾黍離離故國門秋風猶自到江村
鴻歸冥路心還壯豹隱深山霧欲昏
蝴蝶夢中開鐵券麒麟閣上憶金樽
孟城何處英魂在萬里蕭條不可論

虞美人

垓下西風鐵笛繁千年遺恨付荒村
美人死後誰相見葉葉枝枝總是魂

遊仙曲和無衣仙子原韻

天台玉洞散餘霞未羨元都觀裏花
試問蟠桃曾幾熟當年西母降誰家

王氏

王氏鯨山人直妹張文靖妻性端潔宴私地必勤

齋紱有尼聞其戒淨欲入謁閉戶不納後文禧與
直在京追隨患難以疾歸卒氏流離母家與兄德
彰辛苦操作以葬母或勸之嫁曰一木好檀樹移
栽安得生又爲詩云云卒守其志以終

詩

忠臣不貳主烈女不再更兄爲靖難死妹忍改節生

鄒氏

鄒氏宜黃人譚襄敏綸孫婦世襲錦衣衛夫亡流
寓京師教授某相國府中自號涵光老人曾上書
懷宗請南遷不報又請毋令內監守城不報乃扶
夫柩歸里有文集數十卷陳大士序之

感懷

一代邊才重數公先臣謀略最沈雄
雁門師老封疆壞朝局猶然似夢中

一夫作難便夷城名論曾聞陸士衡
宵旰何曾慚廢歷可憐誰督貝州兵

郭家金穴鄧家山朝罷昏昏醉夢間
搜括無多加派又西師猶自閉重關

萬里中原戰骨堆偏關烽火達平臺
金陵本是龍飛地只要長淮控御才

婉秋

臨川東黃塘舖崇正間有閨秀過此題二詩於壁

間而去自署婉秋女史

題壁詩

晚雲如墨帶殘鴉路入迴溪細草遮微雨隨風三四點隔
橋吹濕水荳花

東望遙山一髮青蕭郎何處怨飄零那知今夜黃塘夢尋
過杭州喚不醒

季華

萍鄉縣宜風鎮驛壁間留題云妾本蜀郡越王之
裔良人登第後爲邵陽獄吏踰年天挈孤還故里
偶經此地因賦小詩命男秀郎捧研書壁末署清
和季華

詩

淚痕拭盡嬾梳妝遙倚西風憶故鄉昨夜夢魂留不住暗
隨流水下錢唐

娟

萍鄉旅店壁間有句云云後署女史娟題不知何
許人

詩

烟鬟霧鬢泣秋風鎮日蓬窓不語中一點閒愁隨逝水夜
深和月下湘東

朱中楣

以下 國朝

中楣字遠山廬陵人兵部侍郎李元鼎配有石園

隨草文江倡和鏡閣新集

擬古遊仙詩

洪井尚留丹餐霞堪綺席盈盈若輕舉攬之不可得宛擬
至瓊宮互立仙班側倏起江海游鯨人捧珠出爍爍起層
霄輝煌炯遙壁或理鳳凰琴或窺麟虎迹或誦步虛吟或
促清談膝杳靄度韶音旖旎停雲澤恍惚在天涯徘徊間
咫尺忽覩避秦人忽覩偷桃客擘藕大如船分脯還煮石
控鶴欲凌空懸厓深莫測窈窕復冥冥蒼蒼何鬱鬱團露
染新紅方壺漂紺碧月腦晦還圓星眸炫猶逸珍重廣成
言飛鳧酣數息勝境可能尋山河咸歷歷六著恍然明乾
坤任所適

春日熊雪堂少宰以和黃山谷梅花韻見投同梅君
作

幾年偕隱同歸洛紛紛世態春冰薄今古長安似奕碁惟
有投閒是先著每思登眺帝子樓風雨靡靡滯城郭荒園
頽倚杏花村社鼓頻傳慰恬漠時吟佳句響琳琅滿紙烟
霞真駭愕續貂髡穎韻難成欲附青雲爲寄托綠波隱隱
泛蘭舟紅蓼森森羨華萼隋隄舊院冷鞦韆譙國新旌綴
珠珞海棠無力怯春寒夢破春愁愁滿棗融和天氣正芳
菲芸牕課子差足樂舞燕翻飛墮碧空流鶯宛轉驚鈴索
屈指韶光又一年閒看花開漸花落不關春色苦相催但
恨封姨還肆虐澹宕輕陰潤絃絃良宵煮茗奴稱酪却爲

聽詩減夜眠舉案呼尊共微酌寄語猿鶴莫漫猜而今只
踐山林約

秋雨吟

漫門樗蒲金釧冷暝烟猶綴鞦韆縷一聲新雁動離思叫
徹雲根透纖影翠鈿寒生秋已仲檐敲碎玉驚殘夢急雨
初收間落花清商暗度棲梧鳳素娥青女意颺颺何事深
閨恨夜長燕去燕還還復去閒鷗依舊點橫塘

旅興

身世蒼茫裏烽烟已數千旅愁春候覺歸夢草堂前花徑
迷蝴蝶家山映杜鵑枝頭聞鳥語猶自說燕然

春日感懷

青春作伴已還鄉贏得新詩富草堂
蘇圃漫添湖水綠柴桑難問徑花黃
荒城處處傷離黍舊燕飛飛覓畫梁
家國可堪寥落甚怡情何地足滄浪

舟行晚眺

遠望清流曲曲通孤帆幸逐芰荷風
黑雲片片歸前浦紫燕紛紛掠短篷
岸柳乍搖新水綠山花遙帶夕陽紅
頻聞簫鼓知村近雨過潮平日正中

歲杪荅梅公維揚

久聞關鄉未忍離罪罪應值到家時
梅開芳信書憑早夢繞江干月上遲
彭澤喜裁歸去賦蕪城愁和寄來詩
新篋正熟思君賞獨坐深宵且課兒

舟次清源和梅公韻

南歸欲覓舊柴門何意彈冠赴

特恩三徑未成重理檝千山遙憶隔啼猿香侵蓼國飄紅
粉露滴荷房瀉綠尊遠岸菁蔥連雨足閒鷗飛泛點秋痕
朝廷有道思良弼彤管承家媿昔媛新月含輝雲外吐斜
峯倒影浪中翻偶來墜葉驚詩思厭聽嚴更攪夢煩晚泊
邨宵雞喔喔平原戍獵鹿奔奔天涯蓬轉隨征雁澤畔桑
深卧野豚銀漢乍迴青鵲羽金風漸返木樨魂知君自爲
蒼生出從古惟聞綺皓存把酒漫同兒女醉頻年憂患不
須論

晚秋懷里

落葉驚殘夢秋歸人未歸水明天一色鴉帶晚霜飛

舟泊鳩茲

水濶春迴接楚湘學啼嬌鳥未調簫起來捲幔窺紅色一
抹青山帶夕陽

聞子規

忽聽啼鵑柳外飛聲聲相喚不如歸人歸何似春歸易芳
草萋萋送落暉

春晚

側側輕寒裊裊垂嬌鶯初轉最高枝枕稜畫得金釵響爲
記深宵夢裏詩

宗伯年嫂招集滄浪亭觀女郎演秣陵春

越調吳歛可並論梅村翻入莫愁村興亡瞬息成今古誰
弔荒陵過白門

和梅君五日自潞河歸津門韻

地接蓬瀛任所探扁舟何日泛元潭

潭在吉水

椿萱歲越今逾

九兄弟時憐但有三采藥盈筐懷益母書符結縷佩宜男
移樽共向花前醉擘藕還因雨後甘幾度幽香深院裏半
彎斜月遠林含層雲掩映迷芳樹落照依微度翠嵐鶴草
不須煩媚蝶鸞笙每欲動歸驂千頭種橘寧無念萬里浮
家未可堪却羨數雛環茹哺偶來雙鶴助清談輕風澹岩
消殘暑閒署蕭條憶寸柑戲和新詩君勿笑爲聯險韻我
何愁鴛鴦並浴翻荷蓋鸚鵡頻餐啄玉函茗戰晚烟炊細

沸蟲征宵鼓劫雄酣寒水滴瀝聲催句暝鳥迴翔語覺喃
刻艾懸庭驚燕戶伊蒲繡佛對禪龕鹽梅空負調羹美蒲
酒聊甚供饋慙飄泊漫欣曾解帶逍遙唯喜早抽簪忽雷
纔撥鄉思集方響慵敲旅夢耽偕隱宜從翰墨圃同遊直
到買山菴家有此菴此菴穉兒聽說家園好解望關河問指南

舟行

四年三往返俱值麥初黃不爲當時熱寧甘此際涼出山
原草草歸路任蒼蒼得遂鷗盟約松遊問子房

卜居南浦送梅君之文江

孺子亭邊且卜居新懷爲喜詠關雎池邊嫩柳含紅雨橋
外繁花映碧渠乍得怡情還脈脈却看判袂且徐徐歸期

未定知何日雁度文江早寄書

舟行贈梅君

清風送我出官衙露白橙黃可到家
醉後彈碁頻喚酒詩成閣筆幾烹茶
濕雲帶雨歸殘岫野鷺擎魚啄浪花
是處客帆依暮落凭窗無事聽鳴蛙

憶鄉

昨看月半規今看月已彌晚霞天欲暮
深樹鳥鳴遲異鄉十餘載寧不懷弟妹
椿萱音問稀歸鞭豈容待心緒擾如絲
春光知不知無使花再發俟客到家時

壬辰春偶覩同鄉康小范年家媼寄外詩詞清新俊逸想見其人因漫屬和以志同聲

又值艷陽天花飛撲鬢蟬倚窗評燕語撥柳問鶯眠繡閣
傳芳信文溪濯錦箋漫聽清漏永遙和白雲篇綠嫩紋疑
織紅深媚欲然故鄉新月吐應照掌珠圓

贈涂年姪女南歸

并序

涂映薇之次女王公子小韓之配也兵亂入都能
雪堂少宰解驂贖之育余邸舍數月小韓使使迎
歸姪女依依不忍別走筆六章以當折柳

每話家園淚雨潛薊門秋老雁初還驚魂自逐瀟湘水忍
見湓城山外山

憶昔章江江水潺幾將清瀨蕤紅顏香飄欲散人猶在厭
聽笳聲夜獵還

時慰愁容強作歡漫傷親串半凋殘珠簾暮雨西江月盡
付離人馬上彈

鬻雪餐瓊苦自持誰憐弱息委燕支青青柳色仍如舊寄
與韓郎知不知

共羨山公古道稀黃金解盡出重圍豐城劍合珠還浦故
國文姬此日歸

欲行猶自故遲遲繾綣鄉情未忍離但喜樂昌鸞鏡合粧
臺重畫舊蛾眉

上巳日同梅君攜兒子振裕登滕王閣

水落沙猶曲風恬浪不漩繁櫻依斷渚孤鶩沒遙天醉柳
開新火啼鵲破曉烟登高欣有賦索價問榆錢

自題傳經家慶圖

已亥冬月小陽天梓里舒翁自越旋俱道丹青稱第一果然落紙生雲烟何須繪弗矜人貴且效傳經教子賢共坐石牀聯詠好等閒閒處卽神仙

螺川大水口占紀事

未旱先祈雨時違卽怨天人心今乃爾災異豈徒然市虎方歸穴轟雷又策鞭秧鍼縱刺半木隸已微尖絳水雙流合平疇萬頃捐城垣驚繫黎庶斷炊煙吉水難成字螺峯僅識巔懸知眠未穩爲報席頻遷李郭還同載飄飄江上僊

時梅君招郭郡公於舟中

謝秀孫

秀孫字季蘭寧都州人適魏叔子禧夫亡絕粒而死

自翠微山望金精

薄暮秋初風木葉下庭圃夫君招我遊盤跚出坡樹山菊垂好花陰影隨行步幾折臨高厓歛足不敢顧夫君指金精謂此汝所慕吳王洞口來仙女雲中舉至今千百年烟霞生其處自憐長閨房荏苒秋草暮結廬十五載不識金精路夜月明空山時聞鐘聲度憶我七八歲曾一隨諸婦巾車到洞門嘿然生疑懼洞中忽有光雲殿凌丹艸翠竹搖空寒白日蒙雨霧彷彿記曲水海棠綠石戶草色映羅裙還伴踏花去礪水溼弓鞋逡巡避母怒忽忽三十年仍

向峯頭住世事幾興衰家門亦多故徵蘭不可期弄瓦杳
無與出戶淚如絲入戶淚如雨人生能幾何年光如馳騫
安得辭人間洒掃侍仙馭

池上秋海棠

芳草依碧池佳花點秋石綠葉與紫莖何數秋蘭色主人
策杖行三徑偶相值采之置餅中顏色照几席有如浣紗
女斜立石潭側幽芳獨自憐忽遇五湖客沼吳果何人撚
花長太息

賦得美花香滿衣

濃艷含芬曲檻邊
寒條偶爾立
倉煙清香暗襲羅衫透舞
蝶遊蜂已滿前

賀桂

桂字秋安號竹隱居士蓮花廳人賀士昌女貢士
攸縣令龍有珠室幼聰慧善記隨父官於滁讀藏
書喜臨摹法帖能彈琴後與有珠偕隱龍溪作樓
曰竹隱吟咏其間有竹隱樓詩草

偶吟

雨過閒庭蘭葉新青竹窻深倚看鶴梳翎

獨漉篇

獨漉獨漉劍埋於獄其氣干天不同一割一解死傷於虎

爲虎之偃虎中於機偃且嘆望二解烏鰂噴墨以爲身窟

巧莫之若終死於墨三解衆鳥呼山清濁各別誰欲弋烏

莫中清潔四解

感懷

人生天地間譬如桃與李百卉爭艷後漸隨秋草萎何不
學松柏勁節難與比

憶畫

庭中三尺練悠然山色遠亦復翠微密仍舞啄花燕露餘
光尚新風落香疑軟晴嵐望不滅樹枝影莫見征帆駐輕
飛沙鷗遊戲倦危橋靜綠埜江春幽且艷高閣對清流朱
箔竹陰捲牕似迎花入人如當春怨歷亂集落英寂靜無
鳥轉佳趣留明月物象自深淺

秋日避兵漁家

老漁門對雁沙灘
遠宅竹陰秋意寒
湖光遠望碧千頃
茆屋隔隣青幾團
傍橋楊柳橫披網
疊石蘆花急轉瀾
憑誰爲報籬邊菊
珍重清霜待細看

曉過梧溪

殘月鷄聲埽店霜
半黃秋草露垂光
畫樓牕掩人猶夢
小圃風開菊度香
樹濕珍禽飛細細
江寒殘葦色蒼蒼
山行逕險橫荆棘
折得梧枝憶鳳凰

科兒公車北上賦此寄懷

八音體

金鞭續夢月初低
石路霜濃滑馬蹄
絲冷輕裘風面面
竹連古驛霧迷迷
匏樽注酒分童僕
土屋開扉見犬鷄
革盡寒威春到眼
木榮遲早聽鶯啼

暮秋

小園秋事已蕭疎密蔓寒瓜架未除草壓苔痕埋落葉石
移雲影劇遊魚牕虛翠竹聲無數地靜黃花韻有餘昨夜
月明吟坐久風香帶露似春初

冬日

小園勝事憶殘秋粧點紅蕖畫意收蝶飲香微猶過竹鴉
翻葉盡欲侵樓銷寒剩得書爲侶遠俗還知夢亦幽當檻
垂楊烟澹澹半依松處尚青留

獨坐

晴波如練漾秋江日暮朱霞麗碧窓琴罷鳴爐香欲施強
拈針線思難降

李氏

李氏南昌人諸生姜愉妻才德過人

爲外題畫扇

白石參差屋數間抱琴相訪碧雲閒孤松忽接澄江影一
抹斜暉雁不還

黎大宜

大宜南城人母夢人贈以瓊花一枝而生聰慧通
書史幼許字劉劉久客不歸或勸其母他配大宜
曰有死無二母遂止居嘗吟詩以寓意或獨坐圍
棋或繡花暇則持齋誦經一日卧病夢觀音大士
召之去旣寤作詩云云疾革作絕命詞有未必瓊

花第一枝不禁風雨幾淒其之句遂趺坐而逝逝
三日托夢其父云在圓通殿掌文卷生平所著詩
甚多

病中夢醒作

貞心一點自操持不向人間巧畫眉赤腳已叅禪八乘白
衣猶是髻雙垂瓶中甘露憑誰乞天外楊枝待我披莫道
此間無造化蓮花高座碧參差

朱氏

朱氏吉水人李世長妻

送夫西征

君自重王事妾心未敢違好隨鶯一出記與雁同歸妻子

佇偕隱君親望不微此身關俯仰珍攝向斜暉

徐暗香

暗香字畹蘭南昌人

重陽

又是黃花節江城樹樹秋雁迷雲外路烟鎖夕陽舟夜月
鳴雙杵高風感敝裘閨中殊寂寞閒理玉搔頭

江渚芙蓉老高天白雁飛風霜凋玉樹南北寄征衣把酒
酬籬菊登高望落暉淵明三徑好閒坐欲忘機

寒食

輕寒依舊逼窻紗清曉焚芸漱紫芽三月鶯花寒食老五
更風雨夢魂賒青烟初賜宮中火綠柳頻栽處士家却恐

春光歸去早柴門深鎖碧桃花

萬氏

萬氏新建人裴大司農曰修之母

贈洪貞女

飛仙化蝶總非真譜入情緣亦可人未似洪娥清淨好白頭猶是女兒身

文星

星字奎耀浙江西安人適金溪李光文有秋蟬吟

草

咏風

芳郊冉冉冒遊絲紅杏村邊拂酒旗飽逐布帆斜掛處亂

喧山雨欲來時鱸魚早自生鄉思茅屋空教感杜詩試看
洛陽花國裏吹開吹落總關誰

咏塵

引起東風望欲迷春城輦路雜香泥幾年妝閣生鸞鏡是
處關河逐馬蹄閒撲杏梁春燕舞暗飄柳岸夕陽低山崖
水次清幽地莫共浮雲度澗溪

廖雪松

雪松奉新人夫亡守志

涼夜

月皎池光浮風淒蛩語咽課兒坐危樓挑燈劇愁絕

彭貞

貞字永叔號筠山又號橫江女史崇義人適上猶
儒生蔡世浩夫沒矢志有翠筠山房詩鈔

送春次韻

同是送春人不識春歸路鶯聲曉曉啼似欲留春住時序
一低徊人生泣朝露閑閣寂焚香獨坐有深悟

廢塚

昂藏誰家子葬此山之麓衣冠已如煙枯骨尚盈麓荒草
綠年年淒風號空谷清明暮雨復蕭蕭白楊花裏鵲聲哭
賦得江春入舊年

扁舟過北固淑氣度初春野燒生微翠清流動遠垠岸容
殘臘盡節物舊年新倚棹孤吟處江空不見人

哭外

悲風颯颯正斜曛天末秋聲不可聞生死自來皆有命顛
連未必盡如君飛殘紅雨心腔血愁絕青春嶺際雲無主
花神終夜哭園臺水榭草紛紛

全受全終古訓垂一擔枯骨強支持腸迴燭影鷄聲後門
掩山城木落時剪紙招魂惟有淚撫棺啼父竟無兒可憐
薄幔黃昏月戀戀詩樓不忍離

寒食日掃墓感賦

抔土於今隔九泉我來肅拜淚潸然棠梨花發青幽道寒
食風吹白紙錢長劍已埋高士志荒邱空鎖綠楊煙茫茫
四顧愁何極落日啼鴉下碧天

春閨詞

春日春晴花滿枝
衆芳開盡杜鵑遲
阿儂獨把柴扉掩
愁寂東風總不知

晴

綠槐青柳聽蟬鳴
日照窗紗喜早晴
十二欄干頻徙倚
薰風香送蕙蘭清

鄧氏

鄧氏南城人舉人梅國棟室夫亡自縊死

遣悶

眼看時事欲銷魂
寂寞餘香憶舊恩
梧葉秋風寒翠袖
梨花夜雨掩柴門
石榴慢染裙間色
湘水惟留竹上痕
賦就

哀詞悲楚客坐看明月到黃昏

李寶月

寶月江西人

讀香奩集有賦

畫長宜睡嬾梳頭畧展菱花眉黛愁聞道春江染新綠傷
心時一上西樓

于文娥

文娥江西人

題壁

廿載韶光付水流空將離恨鎖眉頭琵琶夢斷鷄鳴後薄
命紅顏哭未休

江前無名氏烈女

烈女無名氏亦不詳其里居甲寅亂爲賊掠于舟
欲汙之不從抵南昌江前投水者再賊怒瘞之沙
中女罵不絕口齧舌血噴賊面而絕後十餘年里
人吳尹廸過其地哀之啓沙骨已朽乃以衣裹沙
納棺中葬躍龍岡識以碑

絕命詞

與其辱而生不如潔身死目斷山上雲心比江中水

江西怨婦

題雄縣旅壁

新作盤頭卸舊妝銀環換却小明璫風塵改盡當時面不

敢逢人說故鄉

寇盜西南未伏誅
深閨紅粉有何辜
三軍倘若求民隱
應使生還合浦珠

江西難婦

難婦建昌某孝廉妻康熙間人

題徐州驛壁

望斷鄉關行路難
可憐春色已摧殘
兒家夫婿長安道
止恐相逢不忍看

江西詩徵卷八十五